

## MGA TULA NI JOSE RIZAL

### PINATUTULA AKO

Iyong hinihiling, lira ay tugtugin  
bagaman sira na't laon nang naumid  
ayaw nang tumipa ang nagtampong bagting  
pati aking Musa ay nagtago narin.

malungkot na nota ang nasnaw na himig  
waring hinuhugot dusa at hinagpis  
at ang alingawngaw ay umaaliwiw  
sa sarili na ring puso at damdamin.  
kaya nga't sa gitna niring aking hapis  
yaring kalul'wa ko'y parang namamanhid.

Nagkapanahon nga ... kaipala'y, tunay  
ang mga araw na matuling nagdaan  
nang ako sa akong Musa'y napamahal  
lagi na sa akin, ngiti'y nakalaan.

ngunit marami nang lumipas na araw  
sa aking damdamin alaala'y naiwan  
katulad ng saya at kaligayahan  
kapag dumaan na'y may hiwagang taglay  
na mga awiting animo'y lumulutang  
sa aking gunitang malabo, malamlam.

Katulad ko'y binhing binunot na tanim  
sa nilagakan kong Silangang lupain  
pawang lahat-lahat ay kagiliw-giliw  
manirahan doo'y sayang walang maliw.

ang bayan kong ito, na lubhang marikit  
sa diwa't puso ko'y hindi mawawaglit  
ibong malalaya, nangagsisiawit  
mulang kabundukan, lagaslas ng tubig  
ang halik ng dagat sa buhangin mandin  
lahat ng ito'y, hindi magmamaliw.

Nang ako'y musmos pa'y aking natutuhang  
masayang batiin ang sikat ng araw  
habang sa diwa ko'y waring naglalatang  
silakbo ng isang kumukulong bulkan.

laon nang makata, kaya't ako nama'y  
laging nagnanais na aking tawagan  
sa diwa at tula, hanging nagduruyan:  
"Ikalat mo lamang ang kanyang pangalan,  
angking kabantugan ay ipaghiyawan  
mataas, mababa'y, hayaang magpisan".

### SA SANGGOL NA SI HESUS

O Diyos na Sanggol, paano ba kaya't  
Ang sinilangan Mo ay sabsabang aba?  
Diyata't di pa man ay pag-alipusta  
Ang dulot ng Palad sa Iyong pagbaba?

Kaylungkot! O hari ng Sangkalangitan,  
Nagkatawang-tao't sa lupa'y tumahan,  
Hindi Mo ba ibig na Haring matanghal  
Kundi Pastol namin na kawan Mong mahal?

## MGA TULA NI JOSE RIZAL

### ISANG ALAALA NG AKING BAYAN

Nagugunita ko ang nagdaang araw  
ng kamusmusang kong kay sayang pumanaw  
sa gilid ng isang baybaying luntian  
ng rumaragasang agos ng dagatan;  
Kung alalahanin ang damping marahan  
halik sa noo ko ng hanging magaslaw  
ito'y naglalagos sa 'king katauhan  
lalong sumisigla't nagbabagong buhay

Kung aking masdan ang liryong busilak  
animo'y nagduruyan sa hanging marahas  
habang sa buhangin dito'y nakalatag  
ang lubhang maalon, mapusok na dagat  
Kung aking samyuin sa mga bulaklak  
kabanguhan nito ay ikinakalat  
ang buwang liwayway na nanganganinag  
masayang bumabati, may ngiti sa lahat.

Naalaala kong may kasamang lumbay  
ang kamusmusan ko nang nagdaang araw  
Kasama-sama ko'y inang mapagmahal  
siyang nagpapaganda sa aba kong buhay.  
Naalaala kong lubhang mapanglaw  
bayan kong Kalambang aking sinilangan  
sa dalampasigan ng dagat-dagatan  
sadlakan ng aking saya't kaaliwan

Di miminsang tumikim ng galak  
sa tabing-ilog mong lubhang mapanatag  
Mababakas pa rin yaong mga yapak  
na nag-uunahan sa 'yong mga gubat  
sa iyong kapilya'y sa ganda ay salat  
ang mga dasal ko'y laging nag-aalab  
habang ako nama'y maligayang ganap  
bisa ng hanging mo ay walang katulad.

Ang kagubatan mong kahanga-hanga  
Nababanaag ko'y Kamay ng Lumikha  
sa iyong himlayan ay wala nang luha  
wala nang daranas ni munting balisa  
ang bughaw mong langit na tinitingala  
dala ang pag-ibig sa puso at diwa  
buong kalikasa'y titik na mistula  
aking nasisinag pangarap kong tuwa.

Ang kamusmusan ko sa bayan kong giliw  
dito'y masagana ang saya ko't aliw  
ng naggagandahang tugtog at awitin  
siyang nagtataboy ng luha't hilahil  
Hayo na, bumalik ka't muli mong dalawin  
ang katauhan ko'y dagling pagsamahin  
tulad ng pagbalik ng ibon sa hardin  
sa pananagana ng bukong nagbitin.

Paalam sa iyo, ako'y magpupuyat  
ako'y magbabantay, walang paghuhumpay  
ang kabutihan mo na sa aking pangarap  
Nawa'y daluyan ka ng biyaya't lingap  
ng dakilang Diwa ng maamong palad;  
tanging ikaw lamang panatang maalab  
pagdarasal kita sa lahat ng oras  
na ikaw ay laging manatiling tapat.

## MGA TULA NI JOSE RIZAL

### AWIT NG MANLALAKBAY

Kagaya ng dahong nalanta, nalagas,  
Sinisiklut-siklot ng hanging marahas;  
Abang manlalakbay ay wala nang liyag,  
Layuin, kalulwa't bayang matatawag.

Hinahabul-habol yaong kapalarang  
Mailap at hindi masunggab-sunggaban;  
Magandang pag-asa'y kung nanlalabo man,  
Siya'y patuloy ring patungo kung saan!

Sa udyok ng hindi nakikitang lakas,  
Silanga't Kanlura'y kanyang nililipad,  
Mga minamahal ay napapangarap,  
Gayon din ang araw ng pamamanatag.

Sa pusod ng isang disyertong mapanglaw,  
Siya'y maaaring doon na mamatay,  
Limot ng daigdig at sariling bayan,  
Kamtan nawa niya ang kapayapaan!

Dami ng sa kanya ay nangaiinggit,  
Ibong naglalakaby sa buong daigdig,  
Hindi nila tanto ang laki ng hapis  
Na sa kanyang puso ay lumiligalig.

Kung sa mga tanging minahal sa buhay  
Siya'y magbalik pa pagdating ng araw,  
Makikita niya'y mga guho lamang  
At puntod ng kanyang mga kaibigan.

Abang manlalakbay! Huwag nang magbalik,  
Sa sariling baya'y wala kang katalik;  
Bayaang ang puso ng iba'y umawit,  
Lumaboy kang muli sa buong daigdig.

Abang manlalakbay! Bakit babalik pa?  
Ang luhang inyukol sa iyo'y tuyo na;  
Abang manlalakbay! Limutin ang dusa,  
Sa hapis ng tao, mundo'y nagtatawa.

### KUNDIMAN

Tunay ngayong umid yaring dila't puso  
Sinta'y umiilag, tuwa'y lumalayo,  
Bayan palibhasa'y lupig at sumuko  
Sa kapabayaan ng nagturing puno.

Datapuwa't muling sisikat ang araw,  
Pilit maliligtas ang inaping bayan,  
Magbabalik mandin at muling iiral  
Ang ngalang Tagalog sa sandaigdigan.

Ibubuhos namin ang dugo't babaha  
Matubos nga lamang ang sa amang lupa  
Habang di ninilang panahong tadhana,  
Sinta'y tatahimik, iidlip ang nasa.

### ANG AWIT NI MARIA CLARA

Walang kasintamis ang mga sandali sa sariling bayan,  
Doon sa ang lahat ay pinagpapala ng halik ng araw,  
May buhay na dulot ang mahinhing simoy na galing sa parang.  
Pagsinta'y matimyas, at napakatamis ng kamatayan man.

Maapoy na halik, ang idinarampi ng labi ng ina  
Paggising ng sanggol sa kanyang kandungan na walang balisa,  
Pagkawit sa leeg ng bisig na sabik pa-uumaga na,  
Matang manininging ay nangakangiti't pupos ng ligaya.

Mamatay ay langit kung dahil sa ating lupang tinubuan,  
Doon sa ang lahat ay pinagpapala ng halik ng araw,  
Ang mahinhing simoy ns galing sa bukid ay lubhang mapanglaw  
Sa wala nang ina, wala nang tahana't walang nagmamahal.